

Pol Mon Kolosii Wumb Połpu Kindim

Pol Mon Połpu Kolosii Wumb Ngum

¹ Na Pol Gos eim nge noman ele, na to tonu kind mundang kin, Krai Jiisas nge ek se andilim wu, Timosii sinim enginpin.

² Mon ei połpuł kin, Gos nge wumb Kolosii konu owundu ele mulmun ei ngonmbuł. Sinim enginpin en enim Krai kin pii gii nik molmun. Pe Gos sinim Erinpin eim enim noman ka ngopu kin, nga noman emin ngołum.

Prei Elmbil Kunum Ei Ek Ka Nipił Gos Ngołmbuł

³ Sił prei enmbil kunum ei, ek ka nipił, enim kin Erinpin Gos nge sinim Owundu Jiisas Krai ngonmbuł.

⁴ Nimbił erang sin piinpin ei, enim Krai Jiisas kin pii gii nik kin, nga enim Gos wumb tilap ele pei noman ngonmun.

⁵ Kunum ele, ek keimi Gos ek ka kumna opu, enim kin orum. Wang kin, enim piik ei, epi ka enim simin ni piik mulk, epi ei ngurum. Kapli enim pii gii kin, noman ngonmun oł, enim simin ni piik mulnjung epi ei, tonu pel ele pałim ei, enim singii nge tonu epin konu ele salim.

⁶ Gos ek ka ei, epi ka nipi, tu wang nge pupu kin, mei ele wumb konu ele orung orung pei punum. Pamb kin, yi mił, enim kin kunum kumna ek ka

piinjing ei, Gos enim kin noman ka ngum ei, enim ok piinjing ei, keimi pim.

⁷ Enim ek ka ei, Epapras kin, piik kan sinjing ei, sin noman ka eim kin ngamin kin, sin kongun ende wu, eim sin kin kongun ermin mił, Krai kin kongun dinga ka erpi kin, kunum kunum ngonum.

⁸ Epapras eim sił kin ek yi nipi ngum. Ngum ei, enim noman kulnjung ei, Gos Gui Ka enim ngum.

⁹ Puł ełe nge, sił kunum kunum enim kin prei enjpil ei, enim mułmun pa ninjing kunum ei, sił Gos kin kii sinjpil ei, eim noman ełe erngii oł ei, paki tang piingii. Nga Gos Gui Ka enim kin epi kanim kanim ngum.

¹⁰ Nga enim pek kin, mulk pungii ei, Owundu eim noman pimba mił erangin kin, Gos eim kunum kunum ka piimba. Enim kongun kanim kanim ka wii erangin kin, mong oł kun ka wii tumba. Nga enim kapli oł kun ka ei, Gos kin piyangin kin, enim noman ełe piki top mułmba.

¹¹ Enim kapli ei, Gos nge noman dinga ka wii kapli er dinga kindmba ei, kapli paki tang kin, enim epi kanim kanim tonu omba ei, enim dinga puk kin, kui erik mułngii.

¹² Nga enim ka piik, ek ka nik kin, Erinjpin Gos ngungii ei, eim enim to tonu kindim ei, kapli enim eim epi singii pa nim, epi ei singii. Enim kapli singii ei, Gos eim kin pii gii ninjing wu amb ei, sinim tiłang enim konu ełe mołmun.

¹³ Gos eim sinim emii owundu pim konu ełe oł kis erpin mulnjpun ei, eim sipi orung tu wum. Nga eim sinim eim kingam Jiisas Gos eim noman ngołum kangi ei, tep er mołulum konu ełe tuk

kindim.

¹⁴ Gos kingam eim sinim se orung sim. Nga sinim ol kis si kindpi, kil ngang kin, sinim kun ka wii molmun.

Krais Eim Nge Ol Nin Eim Nge Kongun

¹⁵ Sinim Gos eim kinanmin; ba Jiisas kaninmin ei, eim Gos mi ku molum. Krais eim Gos kingam kumna ei, kumb ok mendpi multum. Mulang kin, eim epi kanim kanim endi sineririm.

¹⁶ Gos eim epi kanim kanim pei eririm ei, Jiisas kin ouni molku eririm. Nga tonu epin konu ele, nin mani mei ele epi pei eririm ei, epi kanim kanim kanmin epi nin, kinanmin epi nin, ei pei eririm. Gui mi noman dinga palim sinim kinamin wumb ni, nga owundu wumb ni, nga tep enmin noman dinga palim wumb ni, nga konu orung orung mei ni epi pei Gos eim neng kin, Krais eririm ei, eim nge epi eririm.

¹⁷ Epi kanim kanim endi er sineririm kunum ei, Jiisas eim ok multum. Epi kanim kanim Krais eim dambilpi se ende kindnim ei, eim dinga ele, epi kanim kanim ombu erang kin, tonu onjung.

¹⁸ Jiisas eim Gos nge pii gii wumb tep er mulang kin, kongun kun enmin. Gos nge pii gii wumb ei, eim nge wumb tilap ei, men tolmun ngii mi molmun. Gos nge pii gii wumb noman konj ei, eim pule molum. Wumb Jiisas kumna kui tok pendnjing konu ele si kindpi kin, nga angpi tonu opu, konj mulum. Ei nge eim molpu kumb ele kindpi kin, wu num molpu kin, epi kanim kanim ombu ngopu tep elim.

¹⁹ Ei nge, Gos eim noman ele, epi kanim kanim pei kun mendpił, Jiisas kin erim. Ei yi mił ku, Gos eim oł ei nge, Jiisas kin kindang, piki to mołum.

²⁰ Jiisas ele nge, Gos eim mei wumb orung orung pei ni, tonu epin epi kanim kanim pei ni, eim kin sipi, orung simbii ni piim. Ei nimbił erang, eim ond peri ele to kundnjung. Jiisas ond peri kułum ei, Gos eim noman emin peng ele, ya mani mei ele wumb ni, nga tonu epin ele wumb ni pei kanim kanim eim kin sipi orung eim kin simba erim.

²¹ Ok kunum endi, enim Gos mołum konu ele, enim eim kin turii enj mulnjung. Mułangin kin, enim noman tukrung ele, eim kin opu orung erik mulnjung. Nimbił erang enim noman kis to piik, er mulnjung.

²² Ba pe Jiisas eim ngenj ei ond peri ele kułum ei, Gos eim enim kin erpi sipi kin, eim kin orung seng kin, eim kand nołum wumb mulnjung. Yi er pendpi kin, ek kend ende enim kin pinerang ele, eim mołum konu ele, enim kun tuk simba.

²³ Enim kaplı pii gii ambił gii nik, dinga erik mułngii! Mon peng kin, enim pii gii ninjing ele, kaplı nga noman epi to piinerngii mon! Nga enim kumna kin ek ka piik, pii gii ninjing, pii gii ei, kaplı wakin tunerngii mon! Ek ka ei nge, na Pol kongun wu mołup kin, ek ka ei, wumb mei orung orung konu pei ni tor pum.

Gos Eim Pol Kindang Pupu Kolosii Wumb Tilap Paki Tum

²⁴ Pe na Pol, na ka piip kin, ngenj kumbii ei, enim kin sip kin ngond ei, na kaplı Krais eim, sinim peng embił mił mołum. Sinim pii gii

wumb ei, eim ngenj simb angil pei kulpun ngopun molmun. Krais eim ngenj kumbii sim ei, poru ninerim ele, na paki top erip kin, poru nimbii nip end ei, eim nge pii gii wumb ele, na ol yi mil end.

²⁵ Gos eim na kin kongun ngum ei, enim nge paki tumbii kongun ei, Gos ek ka mong keimi ei pei ni tor kindil.

²⁶ Ek ka ei, kumb ok wumb mulk kunum ei, koi er pirim. Ba akip eim nge wumb tilap ningil ele peni ele opu, poru ninim.

²⁷ Gos ek pii gii ninenjing wu amb enim andan topu ngang kin enim kapli piingii. Piik kin, ek koi er pim ek ei, ka wii mendpil pim konu ele ba ni, tilang owundu mendpil ni, eim nge wumb tilap paki tang kin, piingii ei, eim embe tonu ba. Pang kin, ek koi er pim ek ei yi mil; Krais enim kin tep to tuk molum ei, enim kapli eim kin kui er mulangin kin, kapli enim embe ambil tonu sipi ngumba. Nga Gos nge tilang epi ka wii pei ei, enim Krais kin yi ku singii.

²⁸ Kapli sin Krais nge ek ka ni tor kindpin andan topun kin, enim wumb pei ngonmun ei, sin noman dinga kanim kanim nipin kin, andan to ngonmun. Ngopun yi erpin kin, Gos eim molum konu ele, wumb endeim endeim tu wunmun. Tu wangin kin, Krais kin dambiltpi se ende molk kin, dinga kindngii.

²⁹ Yi mil, na kongun dinga wii end ei, Krais eim noman dinga kis na ngonum ei, tuk na kin kongun enim.

2

Enim Kapli Pii Gii Dinga Nik, Ek Kend Bul Ngok,

Jiisas Kin Ekii Singii

¹ Pe na enim kanip ek nimbii nind ei, na kongun dinga erip kin, enim kin ngunj. Nga Leiyorisiya konu ele molmun wumb kin, nga wumb epi pei na kin kanik, piik enenjing wumb ombu, yi ku nip ngond.

² Na yi eramb kin, en enim noman tuk kapli dinga peng mulngii. Nga en enim wumb endi ongii ei, noman ngok yi erngii. Na yi piind ei, enim noman ka peng ele, kapli enim pii gii er dinga kindmba. Na noman yi palim ei, enim kapli Gos ek koi er palim ek ei, pule piingii ei, Krai eim, ek ei koi er palim ek ei nge, pule eim.

³ Ku kon ele piki topu molum ei, yi mi ku. Gos nge noman kanim kanim ka wii palim ni, eim noman ele ek keimi kun ka palim ni, noman koi er palim ei, Krai eim kin piki to molum.

⁴ Na enim kanip nind ei, wu endi enim ek ka ka nipi kin, noman to ak tumbii ni ermbe ei, kapli enermbe. Yi peng kin, na ek ei nind.

⁵ Na enim kin tep to mula; ba na noman tuk enim kin mol. Nanim enim kin ka piip kin, enim kanip mol ei, enim kongun kun erik, noman ende sek mol kin, nga Krai kin, pii gii nik dinga kindinmin.

Sinim Kapli Krai Kin Tep To Molpun, Noman Konj Simin.

⁶ Enim Krai Jiisas Owundu pii gii nik kin, enim noman tuk ele sinjing. Yi mi ku, nga enim eim kin dambiltik se ende puk mulngii.

⁷ Enim Krai kin dambiltik se ende puk kin, dinga puk angik mulngii! Mulngii ei yi mi, ond

dumbul polpu, mer mani mei ele pupu kin, dinga angilim. Enim kapli ek ka ei, sin enim kin andan to nipin kin, ngunjpun ei mił, enim pii gii dinga nge sik mułgii! Nga kunum kunum enim ek ka nik kin, Gos ngungii.

⁸ Enim kanik kun erik mułgii! Mon peng kin, wu endi ek kend topu ek nipi kin, mei wumb ek nipi enim ngumba. Eim ek keimi nipi enim ngunermba mon! Wu yi nge, ei ek ok kupenjing niłmin oł ei, yi nik kin, nga pii gii ninanmin wumb en enim noman ele piik elmin oł ei, ek yi mił ningii ku. En enim nga Krais kin ek ka nik tor kindnałmin.

⁹ Enim piinmin; epi kanim kanim oł kun ka ni, noman konj ei, Gos eim nge oł kun ka wii ei, Krais eim ngenj ele molpu kin, piki tonum.

¹⁰ Eim molpu kin, Gos eim wu num kumb ele kindpi kin, lo ek kanim kanim pei kin, noman dinga kanim kanim pei, nga eim endeim mendpił. Nga enim Gos kindpin kin, wu Krais kin dambiltik se ende pu molk kin, eim nge noman konj kunum kunum epi keimi epi ei sinjing.

¹¹ Enim Krais kin dambiltik se ende puk kin, nga enim oł keimi erik kin, ngenj kopisiłmin ei Gos wumb molmun nik kin, oł yi elmin. Krais oł erim ele, sinim ok enjpin oł kis ngenj ele, epi dinga si kindpin kin, poru ninjpin. Krais nge oł ei, oł keimi.

¹² Noł pinjing kunum ele, Krais kin dambiltik ok, se ende puk mulnjung. Nga enim noł mandring punjung ei, enim eim kin kui mił tunjung. Nga enim tonu onjung ei, enim Gos nge noman dinga enim Krais kin pii gii ningii. Nik kin, ei

eim Jiisas tukpu ele, er konj kindim. Nga no! pinjing ele, Gos eim enim Jiisas kin, er se konj ende kindim.

¹³ Enim ok kunum endi, kulii wumb mi! mulnjung. Nimbi! erang enim o! kis kanim kanim enjing. Erangin kin, enim Jura wumb mon; ba wumb tilap eipi molk kin, lo endi pinalim. Ba Gos pe enim erpi sipi kin, Jiisas kin ende kindpi kin, nga si konj sim. Gos eim sinim o! kis kil ngopu, si kindim.

¹⁴ Lo ek kanim kanim mon ele mulum ei, sinim to mani kindimba erim ei, Gos eim si kindim. Ek ei yi nirim, "Sinim wumb kis mulnjpun; ba Gos lo ek ei, to pulpe! topu kin, Jiisas sipi ond peri ele nil topu, poru nim."

¹⁵ Mei wu num dinga kin, nga emii peng dinga mulnjung dinga ei, Gos Krai kin eim sipi, si kindim. Eim dinga wu num ei, mei wumb pei andan topu kin, ond peri ele, Gos wu ombu topu, kambii! mani kindim. Kindpi kin, ei wumb pei ningi! ele, wu ombu en enim, epi wii mi! molmun.

¹⁶ Yi mi!, wu endi nga ek wii nipi kin, enim kin lo ek ekii sik kin, kuni nin no! nungii ele; nga kunum owundu tonu omba kunum; nga oi konj tonu omba kunum kuni bii nungii; nga kor kunum piik erngii ek ei, piinerngii mon.

¹⁷ Lo ek ombu min, men mendpi! ekii se omba epi andan tonum; ba Krai eim Owundu mendpi! molum.

¹⁸ Enim wumb eipi kin kos erngii. Nga o! endi kun punermba ei, nemin er kun erngii pa ninerngii mon. Nimbi! erang si sinim or kumb mi! epi kenjpin ele, ermin nik enmin. Nga enim

sin si mani kindamin kin, enjel kin men tok kin, er ngumun nik erngii. En enim ol ei nge piik kin, enim bong ninanmin ni piik kin, enim kin andan tonmun. Nga en enim ol yi enmin; wumb ei en enim bong ninmin. Nimbil erang en enim noman tuk ele, ol kis ermin ni piik enmin ol ei nge, mei wumb noman piikmin ol ei nge piinmin.

¹⁹ Wumb yi nge, Krai wumb tilap mon. Krai ei sinim peng embil mil molum ei, sinim pii gii wumb ei eim ngenj simb angil pei kulpun ngopun kin, molmun. Sinim dambiltpin se ende pu molmun ei, eim ngenj simb angil pei dambiltpin ngenj ende pupun molmun. Sinim ngenj dinga sinim ei, Gos eim dinga ele opu, ba ni piinim mil punum.

Sinim Krai Kin Ende Kol Poru Ninjpin

²⁰ Enim Krai kin tep to kolk poru ninjing. Nga mei wumb noman ele epi kis dinga pei wakin to si kindnjing. Nimbil erang enim wumb lo ei ekii sinmin.

²¹ Lo ek ombu yi ninim, “Nim angil epi ele embilnjii mon!” Nga epi ei, “Nim gupu ele tuk kindnenjii mon?” Nga epi ei, “Nim angil tul epi ele ngunenjii mon!”

²² Epi ombu sik kongun erik kin, yi erangin kin, poru ninim. Sinim wu lo ek nimin ek ei, sinim piipin kin, ekii simin.

²³ En enim lo ek ei, epi ka ni piik kin, sin sinim men topun ek nipin kin, ekii sipin, tep ermin ni enmin. Nga ei, en enim ngenj ele, dinga kindpin kin, ol ei ermin, ni piik enmin. Nga sin sinim bong ninarpin ele, ol yi ermin nik enmin. Ba en

enim ol ei enmin ei, paki tunanim mon! Nimbił erang enim epi ok elmin epi ei, piram enim kin tuk palim. Nga en enim ngenj ele, ol kis enmin ol ei nge, mani kindpin kin, si kindnanmin mon.

3

Gos Sinim Krais Kin Ouni Er Konj Sim

¹ Pe nga enim Krais kin ouni er si kindang kin, angik nga konj onjung. Ok kin, kapli enim noman tuk ele, tonu epin epi ka wii ei, piik er mułgii. Nimbił erang tonu epin konu ele, Krais eim Gos angil ele tundung mandi ele, eim king mołum.

² Kunum kunum enim tonu epin konu epi ele, noman to piingii! Enim ya mani mei ele epi kapli noman to piinerngii mon!

³ Nimbił erang enim ok nge ol kis elmin ol ele nge poru neng kin, kulnjung. Nga enim noman konj ei, pe Krais kin koi er palim ei, Gos kin mandi palim.

⁴ Krais eim sinim noman konj kunum kunum mołmun ei, pułwu mołum. Ekii se, eim konu peni ele orung omba kunum ei, enim yi ku, eim kin ouni peni ele, eim nge tilang dinga owundu enim konu ele ongii.

Sinim Noman Ok Nge Si Kindpin Wumb Konj Tonu O Mołmun

⁵ Yi mił, enim ya mani mei ele ol kis ol ei, poru neng kin, to kundngii. To konduk kin, ei enim kin mołum ei, amb eipi kin ngundmun ni noman palim ei nin, nga wumb en enim ol kis ermin ni piik noman ele yi peng piinmin ei nin, nga ol kis ele eramb nip noman yi palim ei nin, nga kanik

nuwa sinmin ei nin, nga wumb en enim noman ele kan simin ni piik bun bun sinmin, ol yi nge, ei gos kend kin men tok er ngonmun.

⁶ Wumb ol yi elmin wumb ei kin, Gos kapli kumep kis to ngopu, orung kindmba. Nimbil erang wumb ei, Gos ek ekii sinenjing.

⁷ Okrii en enim, ol kis ombu nge erik, molk endik ol kis ei nge, enim tep erpi, se endrim. Se endang kin mulk, nga enim ol ei pei enjing.

⁸ Pe enim ol kis ei yi enjing ei, si kindngii ku. Ei yi mił, noman kis tonu onum; nga jikii pang piinim; nga wumb endi kin noman kis piik ngonmun; nga ek ninmin ei, wumb epi piik kis piik noman kis palim; nga ek kis penj mulum ei, ninmin yi enerngii mon!

⁹ Enim enjing kin, ek kend tunerngii. Enim ok, oknge enjing ol kis ei, mer noman tuk ele palim ei, si tor kind, si kindnjing.

¹⁰ Pe enim wu konj mił, tonu ok poru nik kin, si kindnjing ei, Gos enim kin noman konj tuk ele wumb konj mił, ei erpi mundum. Nga kunum kunum Gos eim noman ka ngopu kin, Gos eim mił er kindang mołmun. Nga Gos Pułwu eim erang kin, wu ei tonu opu, wu konj mołpu, yi erang kin, Gos eim mołum mił, ei pii gii nik kin, pii poł tungii.

¹¹ Ol yi mił enjing ei, enim ninanmin mon! Enim Jura wumb mon; ba pe Jura wumb kin ende mołmun. Nga ngenj kopsik elmin ei, Gos nge wumb ei kin, ei nge ninanmin ei pinalim. Nga wu endi ngenj kopisnarik elmin wumb ei nge ninamin ku. Nga wumb kombur am ei tonu ond pin ele mołmun wumb ni, wumb eipi ei wumb ombu en enim kung simbii mił kapli molk

andilmin wumb ni, nga kongun wii er ngok kin ku sinalmin wumb ei nge, wumb wii mił molk kin, en enim noman ele ermin ni piilmin ol ei elmin. Nga wu tał ende molmbuł. Krais ol kanim kanim pei erang kin, opu ende mił palilim. Nga Krais eim tuk wumb eipi eipi kin, pei molpu si kindnim.

Sinim Wumb Noman Ngonmun Ol Ei Simin

¹² Pe nga Gos enim to tonu kindim molmun. Nga enim eim nge wu amb mułangin kin, nga eim enim. kin noman kulpu ngonum. Yi mił, nga enim ol yi nge, ei sik kin, nga enim yi erngii. Enim wumb pei kaimb sik kin, wumb pei kin ol ka erngii. En enim noman ele kapli ambil mani kindik kin wumb kin ol dinga palim mił, erangin mon! Nga enim kin ol ende erik ninjing kin, kan wiik tangin erngii.

¹³ Pe nga wu endi enim molmun konu ele molpu kin, eim ol kun pinerim ol endi erang enim kin mong endi tonu omba. Enim angnan nol kapli kin wii tangin kin, eim ol erim ei si kindmba. Gos Owundu enim ol ei si kindpi poru nim. Yi mił ku, enim wumb eipi ol kis enjing kin, ol ei si kind yi erngii! Nimbil erang sinim nge Owundu eim sinim ol kis enjpin ei, si kindim. Si kindpi kin, ei mił ku sinim yi ermin!

¹⁴ Pe nga wumb noman koltmun ol ei erpi, tondrung pupu kin, ol kanim kanim pei ngonum. Nga ol ei, epi kanim kanim ombu, ambil sipi kin, se ende kindmin. Pe enim wumb noman kultmun ol ei nge singii.

¹⁵ Krais eim enim noman emin pii ngolum. Nga noman emin pii ei nge, enim noman ele tep er

molpu kin enim dinga ngumba. Gos eim enim to tonu kind mundum ei, ngenj ende mulmun ei, noman emin ngungii ol ei singii. Nga enim kunum kunum kapli ek ka nik kin, Gos kin kunum kunum ngungii.

¹⁶ Kraiss ek keimi kapli, enim kin keimi noman ele tuk mulmba. Enim kapli, wumb endeim endeim kin andan tok kin, er kun erik ngungii! Enim kapli, noman ele ek ka nik kin, Gos kin ngok kapli Sam golang nik, men tok golang nik Gui Ka er dinga kindmba golang ei nik, yi erik kin, Gos kin noman ka piik ngungii.

¹⁷ Nga epi kanim kanim pei ek tangk kin, kongun erik erngii ei, enim kapli Jiisas embe Owundu dinga ele erngii. Nga eim embe ele, kapli enim ek ka nik Erinjpin Gos ngungii.

Wu Amb Tal Kangi Ambil Kin Ol Ei

¹⁸ Enim amb, wenjing ek nimba ei, enim piik ekii singii! Sik kin, ol yi erngii ei, Gos kin pii gii ninjing wumb ol palim mil erngii.

¹⁹ Enim wu, kapli en enim embnjing noman ngungii! Nga enim kapli yi erik embnjing nol kin, ek dinga nik kin, noman embin pimba ol ei, enerngii mon!

²⁰ Enim kangil kapli, ernjing menjing ek kanim kanim pei ningii ek ei, ekii singii. Gos Owundu ol yi enmin ei, noman ngonum.

²¹ Enim ernjing menjing kapli, enim kingenjing nol ek dinga kunum kunum ei ngunerngii mon! Yi erangin kin, enim kingenjing nol ol kis ei si kindik kin, ol kun ka minj nik enerngii mon; ba kangil noman kis pimba.

Kongun Wu Kin Wu Owundu Mołmun Ek

²² Enim kongun wii elmin wumb enim kapli, wu num enim kin tep er mułmun kunum ei mendpił, kongun enerngii mon; ba enim tep enerngii kunum ei, enim kunum kunum kongun erngii ku. Nga enim kapli, Gos Owundu kin mund mong kulk kin, eim embe ambił tonu kindik kin, nga enim noman kongun erngii ele, kun peng mułngii!

²³ Nga enim epi pei erngii ei, enim dinga kindik erngii. Erik kin, yi mił, enim kongun erik kin, ya mani mei ele wumb kin mendpił mon; ba enim kongun erik kin, Gos Owundu kin ngonmun ku.

²⁴ Enim piinmin, ekii se Gos Owundu enim kongun ka yi enjing ele, kumep to ngopu kin, orung kindimba. Eim epi ei nge singii nipi kin, to tonu kindpi sim salim ei, eim nge wumb singii. Nimbił erang enim kapli Krai Owundu kin kongun er ngok mołmun.

²⁵ Nga wumb endi ol kun pinermba mił ermba ei, eim ol yi mił erim ei, eim kumep simba. Sinim kapli Gos kin ek ka ka nipin kin, yi erii ninermin mon.

4

¹ Enim wu num kongun wu tep enmin ei, enim kapli en enim kongun wumb kin, ol ka kun pałim mił erngii. Enim piinmin, enim nge Owundu tonu epin konu ele wu num mołum.

Prei Dinga Erik, Nga Andłam Kun Andik Erngii

² Enim prei dinga kindik elmin ol ei, ambilk gii nik mułngii! Enim prei erngii ele nge, enim kapli noman ka to piik kin, Gos kin ek ka nik ngungii.

³ Enim kapli prei erik kin, Gos ngungii kunum ele, sin kin prei erik ngungii ku. Gos eim kapli sin paki topu kin, eim nge ek ka nipin kin, wumb ngumun konu endi andan tang nipin kin, ngumun ei, Krais ek koi er palim ek ei, nipin ngumun. Pule ele nge, na kan ngii pal.

⁴ Enim kapli prei erangin kin, na kapli ek ei koi er palim ek ei, nip erip kin, kun eramb kin, piingii ei mił, na kapli ermbii.

⁵ Enim kapli, ol kanim kanim torung ngenj wumb mułngii konu ele ol kun ka pimba mił, erik endngii. Enim kongun erngii eni endi wii punerangli eni endi simba kunum ei, kongun erik minj mułngii!

⁶ Enim ek ningii ek ei, singin erang kin, wumb piimin ku ni piinmin ek ei, wumb pei noman ngungii. Nga nim kapli kii sik erngii mił, kun ka erkin kin, Gos ek ka ni orung kindkin, wumb pei ngunjii.

Pol Eim Tikikas Onisimas Kin Tep To Kindim

⁷ Wu Tikikas kapli, enim kanpi nimba ei, na kongun pei enj mił nimba. Tikikas ei, sinim enginjpın keimi, nga eim Gos Owundu kongun wu ka kunum kunum elim wu ei, eim sinim kongun ende wu.

⁸ Na eim enim kin kindinj ei pul ele, enim sin nimbił ol er mułmun ei, enim piik kun er mułngii! Yi erik kin, enim sin noman dinga ngopu kin, paki tumba ni piik er mułngii.

⁹ Na Onisimas Tikikas kin tep to kindind ei, Onisimas sinim enginjpın keimi. Nga eim enim

nge kongun ende wu; wu tał kaplı sin ya oł kanim kanim enjpin oł ei, enim kankıl ni ngungul.

Pol Eim Ek Ka Nipi Kolosii Wumb Ngum

¹⁰ Arisakas eim na kin kan ngii tep to pałmbıl wu ei, eim ek ka nipi enim ngonum.

¹¹ Nga wu Mak kin Banapas tał, el elip, angim angim; nga el elip erinjngıl tał angim angim ku ei, eim ek ka nipi, enim ngonum. Nga eim enim kin opu, enim kin ‘Kaplı Oi!’ a nik, sik tuk singii ei, nanim ek enim kin ok, nip kindinj. Nga Jiisas eim embe ende Jasis niłmin ei yi ku, ek ka nipi enim ngonum. Wu tekliki kei mendpił, Jura wumb tiłap ele mołmun wumb ei, pii gii ninjing wumb ei, na kin paki tok kin, Gos kongun wumb tep er mołum konu ele, Gos wumb tep er mołum kongun ambıl tonu sik kin, en enim kongun yi enjing. Erik kin, nanim noman dinga ngopu kin, paki owundu mendpił tonum ei, kaplı na mułmbii.

¹² Epapras eim ek ka nipi enim ngonum ei, eim enim nge wumb ende, nga eim Krais Jiisas nge kongun wu. Kunum kunum eim prei dinga kind erpi, Gos ngang kin, kaplı enim paki tumba. Eim Gos kin prei er ngang kin, Gos kaplı noman pałim ei piik kin, Gos ek ekii sik, keimi ni piik er mułngii.

¹³ Na eim piip kanip, si kindip kin, na yi nip tor kindind. Eim kongun dinga erpi kin, enim paki topu kin, nga Leiyorisiya kin, Erapolis wumb kin, pei paki topu ngonum.

¹⁴ Luk sinim nge ond mong ngolum wu ka, eim kin wu Diimas wu tał, ek ka nikił, enim ngonmbul.

¹⁵ Enim kapli, na ek ka nip kindind ei, enim nik kin, na Gos kin pii gii ninjing ei, engnan no! Leiyorisiya konu owundu ele mo!mun ei ngungii. Nga nimba kin pii gii ninjing wumb pei, amb eim ngii ele kulou tok men tok kin, kunum kunum erik enjing.

¹⁶ Pe nga mon ek ei, enim gerik poru ninjing kin, nga pipe ei, Leiyorisiya men to ngo!mun ei, Gos tilap ele mo!mun wumb ei ngungii. Ngangin kin, wumb ei gerngii ku. Nga kunum ele, Leiyorisiya wumb enim mon piik kin ngungii ei, enim gerik piingii.

¹⁷ Pe enim Akipas kanik kin, yi mi! ningii, “Owundu nim ngurum kongun ei, dinga ambi! gii ni mu!ngii!”

¹⁸ Ok mon pulum ei, na kongun paki to!um wu pulum; ba akip na Pol, na nam pipe ei po!up kin, enim ‘Ka mu!eiyo!’ ek ei nip enim ngond. Enim piyei! Nga enim na kin noman to piingii ei, na kan ngii ele pep mo!. Gos nge noman kaimb sim ei, enim kin pengli.

Gos Nge Ek Ka Ei Sinim Kin Ngolum
The New Testament in the Nii Language of Papua New
Guinea

Nupela Testamen long tok ples Nii long Niugini

copyright © 1980 Wycliffe Bible Translators, Inc.

Language: Nii

Dialect: Central Wahgi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 18 Mar 2025 from source files dated 31 Aug 2023

57529bce-9e23-5350-904d-243a1b359818